



## Comunicado di Prensa

4 di november 2021

### **Cft: "Mester aproba presupuesto e aña aki mes ainda"**

**Philipsburg – Sint Maarten a entrega Colegio di supervision financiero di Corsou y Sint Maarten (Cft) un proyecto di presupuesto pa 2022 y, di acuerdo cu e Ley di Reino di supervision financiero (Rft), mester aprob'e e aña aki mes ainda. Cft ta urgi Gobierno particularmente pa limita e gastonan y aumenta e entradanan, entre otro door di mehoracion di cumplimiento cu e obligacionnan fiscal. Gobierno di Sint Maarten ta para dilanti di retonan grandi, pero cu sosten di Hulanda y di e Fondo Fiduciario por realisa e reformanan tan necesario y traha structuralmente na e mehoracionnan.**

Economia di Sint Maarten ta recuperando bon. Pa e aña aki FMI ta calcula un crecimiento economico real di 4% y pa otro aña di 15%. Otro aña ta spera un miyon pasahero di crucero y 1,1 miyon di movimiento di pasahero na vliegveld. Pa un mayor recuperacion, renovacion di e aeropuerto ta esencial. Tambe ta importante pa inverti e proximo añanan den e infraestructura di caminda y den haf.

#### **Aprobacion di presupuesto na tempo**

Sint Maarten tin dificultad grandi cu aprobacion di presupuesto y di e documentonan di hustificacion financiero na tempo. Sint Maarten a aproba e presupuesto di 2021 dia 9 de september. Segun e Rft, esaki ya lo mester tabata e caso dia 15 di december di aña pasa. Sint Maarten a entrega e proyecto di presupuesto di 2022 na Cft dia 27 di october. Cft ta urgi pa aproba e presupuesto di 2022 na tempo, pa Gobierno ricibi mandato di Parlamento pa ehecucion di e presupuesto.

#### **Debe publico y subsidio di gasto di salario**

Sint Maarten a ricibi na 2021 ANG 118 miyon na sosten di likidez den forma di un prestamo di Hulanda na 0% di interes. E debe publico di Sint Maarten ta aumenta te na ANG 1.398 miyon, loke ta nifica aproximadamente 79 por ciento di e Producto Interno Bruto. Aki ta trata di mas di 23.000 florin pa habitante. Un parti importante di e sosten aki ta destina na subsidio di gasto di salario. Na 2020 a paga na e empresanan ANG 72 miyon na subsidio di gasto di salario y pa 2021 ta presupuesta e montante na ANG 53 miyon. Entrante dia 1e. di october a para e subsidio di gasto di salario. Sint Maarten tin si un retraso considerabel den tramitacion di e peticionnan di subsidio y den stipulacion definitivo di e subsidionan di gasto di salario. Cft a urgi pa soluciona e retraso aki prome cu dia 1e. di december 2021 y pa indica cua parti di e subsidio di gasto di salario a paga di mas.

#### **Presupuesto balansa na 2023**

Pa 2022 Sint Maarten ta spera ainda un deficit presupuestario considerabel. Pa limita un aumento mas grandi ainda di e debe, Sint Maarten lo mester reduci e gastonan y aumenta e entradanan, na prome instancia pa medio di medida cu ta aumenta cumplimiento. Pa 2023 Sint Maarten lo mester realisa ekilibrio presupuestario y un surplus pa e añanan posterior, di moda cu por cuminsa cu pago di e debe. Un ekilibrio riba servicio ordinario den presupuesto tin como bentaha cu Sint Maarten por reclama prestamo di capital cu registro Hulandes.

#### **E fondonan di cuida**

E situacion financiero di e fondonan di cuida na Sint Maarten ta preocupante. Segun calculacion, pa fin di 2021 e deficitnan di e Fondo di Seguro Medico (ZV), di Seguro di Accidente (OV) y e Fondo di Seguro Medico di Pensionado di Gobierno (FZOG) lo subi te na ANG 328 miyon. Esaki ta un situacion insostenibel. P'esey, dia 1e. di januari 2022 lo subi e limite salarial pa e areglo di gasto medico y di accidente na ANG 120.000, lo ahusta e contribucion di e empleadonan den sector publico mas na esnan den sector priva y e mandatarionan politico lo bay contribui na e seguro medico. Ademá, ta importante



pa, na termino cortico, substitui remedi specifico cu remedi generico. Cu esey Sint Maarten por spaar un suma di aproximadamente 12 miyon florin pa aña.

### **Maneho financiero**

Cft ta enfatisa e importancia di mehoracion di e maneho financiero den colaboracion cu organisacion di trabou temporal y ta sali di e punto di bista cu realmente lo cumpli cu e fechanan limite stipula. Cft ta balora positivamente e medidanan inserta den e pakete di Pais Sint Maarten, incluso creacion di un programa di cumplimiento na Servicio di Impuesto. Ta necesario pa finalisa mas pronto posibel e discusion cu Hulanda tocante ponemento di sosten disponibel pa tal fin, pa Sint Maarten por pone man na obra cu e proyectonan esencial aki. Den caso di maneho financiero, Cft a pidi atencion tambe pa maneho di activo, incluyendo e biennan di capital transferi for di e fondo fiduciario.

### **Fondo Fiduciario**

A pesar di e crisis di e pandemia di Covid-19, toch den e ultimo añanan a logra basta progreso den e proyectonan di e Fondo Fiduciario. A cuminsa cu reconstruccion di e terminal di aeropuerto y lo finalis'e na 2023. Cu interes Cft a tuma nota di e proyectonan cu ta pone capital di trabou y prestamo suave na disposicion di empresa chikito y mediano y ta mehora resiliencia social di e poblacion. Algun proyecto den e ambito di ordenamento teritorial lo rekeri un horizonte mas aleu cu 2025.

E miembronan di Cft di Corsou y Sint Maarten a haci un bishita na Sint Maarten di dia 2 te cu dia 4 di november 2021 y a hiba combersacion cu Gobernador suplente, Ministro di Finansa, Consejo di Ministro y e Comision Financiero di Parlamento. Cft a bishita tambe Oficina di Planificacion di Recuperacion Nacional (NRPB), Aeropuerto Internacional Prinses Juliana (PJIA), Controlaria General di Sint Maarten (ARS) y e Ehecutivo di Seguro Medico Social (SZV).

Dia 1e. di november Cft Boneiro, Sint Eustatius y Saba a haci un bishita na Saba y a hiba combersacion cu Colegio Ehecutivo, Consejo Insular y e Compania di Electricidad di Saba.

[Fin di e Comunicado di Prensa]

#### **Fotografo:**

Edgardo Lynch

#### **Texto na e potret:**

Sint Maarten mester aproba e presupuesto prome cu dia 1<sup>e</sup> di januari y tuma medida den cuidado.

#### **Nota pa redaccion – no pa publicacion**

##### Persona di contacto na Cft:

Secretariado di Colegio di supervision financiero di Corsou y Sint Maarten  
Telefon +5999 461-9081 / +5999 461-9082 / +5999 461-9084  
Email info@cft.cw  
Internet www.cft.cw

##### Persona di contacto cu Prensa:

Jefka Alberto  
Telefon +5999 512-6861